

SMARE DEMOCRISTIANE: PROVAREIS!

La piês porcade dai partits democratics (cristians, marcsisj e vie) e jè stade la reazion cuintri di chêi che àn vût il fiât di no votâju. Aromai, usance lôr, al ere un dirit votâju, seben che no vevin fat redensie di nuje. Si veve di votâju o pal ideâl cristian (dulà ?) o par vie ch'a erin il partit dai lavoradôrs (dulà ?) o parceche a erin un partît «democratic e antifassist». Poben, massime in Cjargne e te Alte, e àn palesât tant di chel velen e tante di chê rabie che si crodeve dome che petassin un ton.

A erin sigûrs di vê i vôts de int. Par dirit di nature. Cuanche la int, seti par un mutîf seti par un âtri, ur à dit un siôr nò votant la liste di Union Popolâr Furlane, la prime robe che àn savût dî, dopo di vê butade la bave pal convulc, e jè stade cheste: «Provareis cumò a vignî a domandânus un plasê!»

Di front di cheste arogance, di cheste mafie, di cheste prepotence dal podê che chê di Mussulîn e pô lâ a platâsi, si pô dâur une sole rispueste: «La prossime, dople razion!». Parceche se cheste e jè la democrassie che ducj a van spanpanant sun ducj i intonos, e ven propit voe di dî: «Benedets chêi di prin! Amancul si saveve ce ch'a erin e si parâvisi». Invessit cumò si à di votaju parceche i bêz ju àn lôr e lôr a son bogns di fâure pajâ sauride à ducj chêi ch'a balinin fûr di trop. Ma cheste si puedie in cussiense clamâle democrassie? No saressial plui just clamâle cui so non rût e crût di «mafie» o di «ditature»?

E po', i bêz che i furlans e àn pajât fintremai cumò in tassis, i sudôrs dai emigrants, il sanc dai soldâts restâts sul front par difindi lis lor spaltadis sono robe nestre o di un partit? Vîno dirit par dirit o vîno dirit dome par vie che ju votin?

Nus àn dit ch'o provarin a lâ a domandâur un plasê. Intant no si domande nissun plasê, che l'Italie ti mande la bolete des tassis cence domandati par plasê. E po', se le metin cussì, e jè la volte buine par tornâur il ton cui intaress. La prossime, vadi l'an ch'al ven, dople rate! Sul inprin, cert, la pore nus ven a nô, ma, dopo, la pore ur ven a lôr, parceche si viodin a sejanpâ la int. Par chel ur disìn a ducj chêi che àn vût il coragjo di dîur di no cheste volte: «Puars vuâtris s'o molais! O veis di tignî dîur ancjmò di plui. S'a vegnin a fâus pore, al ûl dî che la pore le àn lôr!».

Nô no vîn nuje ce provâ, parceche di mancul di nuje no varin e l'ajar al è a gratis.

E alore si rispuîndjur: «Provareis vuâtris, ch'o eris sigûrs di vê da fâ cun int stupide o rassegnade o cence memorie».

Come ch'al dîs Caldwell: «Cuanche i popui a viodin clâr, puars mai lôr chêi ch'a ur tegnin il pît sul cuel!».

Jugn 1976

pre Antoni Beline